

紫元君授道傳心法

長生陰真人註

夫授道先授心心真道不二心偽道不真志
 管心中氣氣從心中生乃成心中至付道在
 師心領道心如是兩心合一心心元都不二
 奉師先奉心獻師先獻至口若負師言空言
 心不至奉行先觀心虛行不至自誤誤自
 心師心看誤意言發自無心怨師心不至學
 道先鍊心自心猶不真師心豈無二口授道
 說東心元向西去誑人自誑身道心元不異
 一心行誑心萬處亦如是授學如浮雲浮雲
 無定止終日妄區區不離生死地傳道須在
 心心口言不二願善自守心道門自將至若
 自心悠悠誰心肯依至如人使三師師多鬼
 競起真師豈出門偽師亂家鬼從此煩人心
 失却道中事愚人誑智心凡眼惑智眼真人
 教門深道來亦不速授教先授心道士心莫
 散千說萬遍言真道有一門一門象三才三
 才出三丹三丹自三皇三皇自混沌混沌生
 天地天地列四極四極生造化造化生萬象

萬象生萬物萬物生一門一門在一心夫學
 道之士知我仙教上宗萬無一人賢者即會
 愚者即非其道欲教授為人師與賢者說莫
 與愚者施以說即見非非猶師之過矣我從
 立天地之始其法不二只在混沌氣為元凡
 俗之人妄求外法失我道元致人之有死者
 世世不知有萬億數也蓋為失却道根今以
 切論心源流行後代在心如丹用曾曾為液
 使調膠最能白雪相伏感氣成龍雲騰一變
 七反猶曾使我五藏化如風氣堅骨壯志皮
 肉通籠明徹如鏡詞煩不達藥在西東南北
 必伏日月昇騰成而在手失而在心師我父
 母夫妻得朋不越四象殺氣相凌撫我即在
 默我即沈合我道機與我心同修文文託天
 降雲龍世而不絕學士用心真言教心心真
 道正虔誠修真三丹歸命九轉玄門神符靈
 聖天一得之結繩為證莫不因心要術無病
 元始教心三才終定稽首言歸知心如命繫
 以龍虎歌曰
 四者混沌五行之祖

一曰曾曾為使使為氣氣為筋二曰陰中
 陽陽為日之魂魂為日之精精為陽陽為
 父父為胞衣三曰從白液化為堅冰堅冰
 是陰中陽陽為骨骨德氣而生白液白液
 為髓名四曰水銀水銀為肉之氣氣為血
 血化毛髮毛髮憑皮膚為玄郭而成質可
 知三箇月成形十箇月生餘兩箇月沐浴
 合一年終稟天成象適用五行而輪轉得
 名天地至寶如人受天地正氣亦為至人
 我大道仙人藥寶不同在世有價之寶只
 如世間所用金銀珊瑚碼碼真珠之類並
 量其功價以貴賤論之唯有我仙丹象日
 月之光明徹此則法天象地之寶令人服
 之可得長生天地齊畢皆是憑自然混沌
 之氣而成道焉其混沌之氣在天為霧露
 在地為泉源沈如碧潭之色即是自然之
 道也仙士勿令錯用意妄將變質白藥錯
 服食如道士得我自然之道四氣混沌至
 藥但服食一千日則知神化路不遠矣如
 四氣不足即為神化無憑亦象至人日月

不足豈為至人乃知至人合天地文理為聖世人以時物文理為哲哲者自為聖人乎乃自明其道秉世間機運動以功成法焉量其作事根性遠近時至盡化為灰燼唯我三清官神化藥寶然得保命長生天地齊畢其道不合傳之如傳在得人付之緣道本無形以五行氣相侵為根人本無至以心為至如心惡即言凶言凶即行跡行跡道不成所以三品之丹付質不付意愚者心暗於世終日覽仙方書訣而念之元不得其道性性由心也休粮服氣道引修行忘治穀神存魂安魄凝神定思一法已上並是道之空門實非長生之理九鼎之丹用四時火氣張設文武不能候而脫成大器希聲寶貴難貨至人難識也

鉛為匡郭周禮祐助青瑤為使能調風雨

曾青能為一切金丹使使為氣氣為筋筋成大力焉夫藥不至者蓋猶曾青之力為使如人不食即無力食象氣氣象使使象食無食力乃事不勝矣夫功皆從力而生

成大壯矣藥無力即無靈而安身
白液金花冰生龍虎

龍虎本從虛無氣中相承變法天道感化而運得四時天地成象之器然各稟發生猶四時薰蒸各有所歸生死始啓道本元者得名龍虎龍虎緣陰陽二性和合相吞伏之氣所知從虛無氣中生有為之質然修善去惡即成之

三一昇騰必定規矩

三一者准上三丹各有歸魂守一之法論至藥門中四氣筋骨血肉相承之法不失纖毫勿令失其陰陽時候每月初發火從一日數九九之法此三一法並是內三一之法用十二箇月火候管十二時配十二位行九宮象八卦合五行黃帝於皇人處請問三一之門因此流傳口訣授之如世世仙士付之亦勿令載於書方訣上以口付之若不依此三一規矩縱解萬般小法能變黃白救世財寶如積山亦未免身死矣終不是保命之法學而知之者善

赫然還丹日月光顧星辰透明雲中見路

其還丹成赫然分明亦如木中有大火雖不露其色如青中帶赤氣服之一千日化肉質換骨通靈安神定魄反老成少感天神助之通於神明不得輒妄泄露却如未得道之日可以成道矣雖未滿陰功之間且得度世不死矣可知大道無跡不失其根本人不失其父母之遺體除此一萬般妄制伏水銀成黃白不得為真道之門也訣中思深會者有數百歲之間生死不住仙士傳之通相保護哀哉流言更無別故訣中說至藥教人長生之門至藥與世實別仙人藥寶千鍊萬化全其舊體令人服食可知神得長生之路所以我惜時貴命輕財愚者即時貴世有之財寶救一朝一夕妻妾榮華行屍走鬼輕命棄時自取滅亡百歲之間死者不知其數元君所以哀哉世人流行藥中妙道已化真人勿令妄運動各令四人歸業守道安貧共成寶命之藥亦名酉二八二八成一斤之數白液

白雲是也白雲聖沐是也所以言將酉二
 八酉合入二性同於丹砂勿令常人知之
 以火候一數九九九午之位也然三一中
 云三日一候三三如九九數足其帶紫黑
 色者元君讚之惜於後世仙士所論歌訣
 願明於師勿令心二者可以長生備矣可
 知天本無親以心為親天本無私以心為
 私天本無災以人為災災由人興非天與
 人學士不辜於師子莫逆於父母即天道
 長久矣即人師傳備矣所以論至事不二
 至藥無雙天人合道明然可增其福火不
 雜矣若骨多則肉不勝肉多即骨不勝骨
 肉俱由筋可壯其力力猶骨也如無力即
 如有袋不盛物豈能立焉無嬰兒不戀母
 嬰兒失母即如藥無筋為藥由主力也無
 力自無神化之功如會者一言見三般支
 條不會者即經歷千書萬訣不離為愚人
 好先求黃白不尋讀仙書究其至寶者多
 好黃白未見一兩不覺身亡賢者好其至
 藥雖未見藥之玄門且積善如然神無愛

十三

利之心守道安貧天必不罰矣善慶從人
 師自感其至且從攝軒之前後累求仙矣
 陽氣數極一百八陰氣相礙自相結赫然紫
 色成還丹服餌長生不可說丹砂一味更無
 別子母相生無休歇世人不知費財寶悟者
 為之大還訣有訣不彰有序不迷得之感之
 可傳可說一名土之父二名水之母三名號
 黃芽四為七十二石晶如無藥不成黃芽天
 生物子母相相沒子母不相拋母向子中出
 玄之又玄在眼前陰中有陽道自全陰陽不
 離得和合鍊之服之得神仙一名準中成二
 號大道名採續不斷添之自靈在天為霧窈
 在地為泉源數盡陰陽數得之終不言甲子
 下火當旬候旬候得子母仍舊旬候數足自
 周旋從此堪為兩分首一名真源秋石二名
 大道精魄還丹採之合宜離塵是塵仙客日
 月非我形陰陽自成質乾坤造化中六合皆
 歸一壇靈為宮塚之又濛一旬方一候一沐
 又還濛數足自靈聖乾坤處處通
 右壇靈為宮等句吾神室也

紫元君授道傳心法